

阿毗達磨藏顯宗論卷第三十四 鬱四

尊者 衆賢 造

唐三藏法師玄奘奉詔譯

辯賢聖品第七之六

道亦名為菩提分法此有幾種名義云何頌

曰

覺分三十七 謂四念住等 覺謂盡無生

順此故名分

論曰經說覺分有三十七謂四念住四正斷

四神足五根五力七等覺支八聖道支盡無

生智說名為覺隨覺者別立三菩提一聲聞

菩提二獨覺菩提三無上菩提無智睡眠皆

永斷故及如實知已作已事不復作故此二

名覺三十七法順趣菩提是故皆名菩提分

法此三十七體各別耶不爾云何頌曰

此實事唯十 謂慧勤定信 念喜捨輕安
及戒尋為體

論曰此覺分名雖三十七實事唯十即慧勤
等謂四念住慧根慧力擇法覺支正見以慧
為體四正斷精進根精進力精進覺支正精
進以勤為體四神足定根定力定覺支正定
以定為體信根信力以信為體念根念力念
覺支正念以念為體喜覺支以喜為體捨覺
支以行蘊攝捨為體輕安覺支以輕安為體
正語正業正命以戒為體正思惟以尋為體
如是覺分實事唯十前五即是信等五根由
境等殊分為三十更加喜捨輕安戒尋戒分
為三復總成七并前合成三十七種毗婆沙
師說有十一身業語業不相雜故戒分為二
餘九同前念住等三名無別屬如何獨說為

慧勤定頌曰

四念住正斷 神足隨增上 說為慧勤定
實諸加行善

論曰四念住等三品善法體實徧攝諸加行
善然隨同品增上善根如次說為慧勤及定

何緣於慧立念住名慧由念力持令住故何

故說勤名為正斷於正修習斷修位中此勤
力能斷懈怠故或名正勝於正持策身語意

中此最勝故何緣於定立神足名諸靈妙德
所依止故何緣信等立根力名以增上故難

屈伏故何緣此五先說為根後名為力由此
五法依下上品分先後故又依可屈伏不可

屈伏故下品信等勢用劣故猶為所治同類
屈伏上品翻此故得力名所說覺支為有何

義能覺悟義名為覺支若爾覺支唯應有一

不爾念等是擇法分皆順擇法從勝為名或

覺之支是覺支義若爾應許覺支唯六不爾
擇法是覺亦覺支所餘六種是覺支非覺所

說道支為有何義尋求依義名為道支若爾
道支唯應有一不爾餘七是正見分皆順正

見從勝為名或道之支是道支義若爾應許

道支唯七不爾正見是道亦道支所餘七種
是道支非道當言何位何覺分增頌曰

初業順決擇 及修見道位 念住等七品
應知次第增

論曰初修業位說念住增謂此位中為息顛

倒由念勢力於身等境自相共相能審了知
壞二種愚慧用勝故於煖法位說正斷增謂

此位中見生死過涅槃繫功德遂能勇猛發勤
精進不墜生死速趣涅槃繫勤用勝故於頂法

位說神足增謂此位中能制心識趣不退位終不匱乏信等善根定用勝故於忍法位說五根增謂此位中永息惡趣終不退墮速入離生增上義成根義勝故世第一位說五力增謂此位中不為煩惱之所屈伏力義勝故雖忍位中亦容如是然非決定是故不說或此位中不為一切餘異生法之所屈伏故於此位力義偏增修道位中近菩提位助覺勝故說覺支增或此位中斷九品惑數數覺故覺支義增見道位中所有道義皆具足故說道支增謂尋求依及通往趣二義具故說名為道見道位中二義最勝謂見道位聖慧初生如實尋求諦理勝故又於此位不起期心能速疾行往趣勝故隨數增故於契經中先七後八非修次第有餘於此立次第言行者

最初由慧勢力於身等境自相共相如實了知導起眾善如有目者將導眾盲是故最初說四念住由四念住了眾境已於斷惡修善能發起正勤故於第一說四正斷由正勤力令相續中過失損減功德增盛於殊勝定方能修習是故神足說在第三勝定為依便令信等與出世法為增上緣由此五根說為第四根義既立能招惡趣惡業煩惱不能屈伏由此五力說為第五力義既成能如實覺四聖諦境無疑慮故說七覺支在於第六既如實覺四聖諦境^{聖四}厭捨生死欣趣涅槃故說道支以為第七於中一一辯其次第如釋經論應正思求今此論中思擇法相於次第理無勞煩述三十七覺分中幾唯無漏幾通二種頌曰

七覺八道支 一向是無漏 三四五根力
皆通於二種

論曰此中七覺八聖道支唯是無漏唯於修
道見道位中方建立故謂修道位七覺支增
隣近菩提謂治有頂故覺支體一向無漏一
切覺分皆助菩提唯此獨標覺支名者以最
隣近菩提果故由此理趣證七覺支應知但
依治有頂說此為上首類治下地唯於無漏
立覺支名若不許然寧不通二或於一切菩
提分中依近菩提立覺支號道中修道位近
菩提性近菩提唯是無漏故無漏修道方立
覺支名見道位中八道支勝故此一向無漏
性攝雖正見等亦通有漏然彼不得聖道支
名聖道支名自無漏故又諸論者許覺分法
覺支後說定是無漏若說在前便通二種既

卷四

五

覺支後方說道支故八道支一向無漏所餘
通二義唯已成謂覺分中前位增者彼於後
位勢用亦增後位增者非於前位故毗婆沙
作如是說從初業位至盡無生念住常增乃
至廣說此三十七何地有幾頌曰

初靜慮一切 未至除喜根 二靜慮除尋
三四中除二 前三無色地 除戒前二種
於欲界有頂 除覺及道支

論曰初靜慮中具三十七於未至地除喜覺
支於下地法猶懷疑慮未能保信故不生喜
又未至定初現前時未能斷除下地煩惱後
雖已斷而類同前故起彼時皆無有喜有說
一切近分地道皆勵力轉故無喜義第二靜
慮除正思惟彼靜慮中已無尋故由契經說
彼地無尋彼上等持轉寂靜故由此二地各

三十六第三第四靜慮中間雙除喜尋各三十五前三無色除戒三支并除喜尋各三十二欲界有頂除覺道支無無漏故各二十二如是諸地隨其所應覺分現前少多無定謂隨位別後必兼前可一體上義分多種故有多種俱時起義唯四念住必不俱生以約所緣分為四故尚無二慧俱時而生況有一時四慧並起不可一慧約境分多以若總緣法念住攝必無一慧於一刹那緣四境生四行相故由此理趣初靜慮中總而言之具三十七然於一念頓現在前極多但容有三十四如是未至第二靜慮極多但容有三十三四中間極三十二前三無色極二十九欲界有頂極唯十九一切皆除三念住故其中減者隨位應思何故心王不立覺分理亦攝在

卷四

六

念住等中彼實攝諸加行善故然不別立如慧等者心於雜染清淨分中勢用均平無所偏黨覺分唯在清淨分中勢用增強是故不立有餘師說覺分多緣諸法共相心王多分緣自相生是故不立有餘復說修習覺分本為對治一切煩惱然諸煩惱心所非心故能治法非心唯所障治相翻而建立故有說覺分輔佐於覺覺是心所慧為體故不可心王輔佐心所如王不可輔佐於臣所以心王不立覺分有餘師說心導世間於界趣生輪迴無絕修習覺分為斷生死由此心王不立覺分有餘師說無始時來心為衆多煩惱雜染馳散諸境懽悵難調為調伏心修習覺分非所調伏即是能調是故心王不立覺分何緣諸大心所法中唯立四法為菩提分實總攝

在念住等中彼實攝諸加行善故然別建立
念定慧者由此三種順清淨品勢用增強可
立覺分想思觸欲於染分中勢用增強故不
別立於假想觀勝解偏增覺分惟攝順真實
觀由此勝解非覺分攝有餘師說至無學位
勝解方增經但立為無學支故菩提分法有
學位增由此為因力能引起三菩提故所以
勝解非覺分攝作意勢力能發動心令於所
緣易脫不定覺分於境審諦觀察令心專一
與彼相違是故作意非覺分攝若爾寧立尋
為覺分尋於境界雖策發心而欲令心推求
至理非令於境浮飄易脫於諦觀察有策發
能說此力能策正見故由此作意不可例尋
有餘師言若染若淨初取境位作意力增說
為非理如理作意至境相續彼勢力微故不

立為煩惱覺分煩惱覺分要於至境相續位
中方增盛故受於雜染清淨分中勢用俱增
故立覺分由此流轉緣起支中立為受支及
於還滅菩提分中立喜覺支有餘師說受於
雜染雖是增上而與淨品作饒益事亦有功
能如旃荼羅性雖鄙劣能與豪族作饒益事
故於靜慮為饒益支菩提分中立覺支號何
緣三受皆通無漏覺分惟喜非餘二耶覺分
所為行相猛利樂捨行相遲鈍故非有餘師
言樂捨二受為輕安樂行捨所覆相不明了
是故不立何緣大善心所法中惟立四法為
菩提分實亦總是念住等攝彼實總攝加行
善故然別立信勤安捨者由此四種順覺強
故如何此四順覺用強發趣菩提信為上首
將修衆行信為初基清淨果因以信為本若

無信者修趣不成故立信根以為覺分有餘師說如清水珠置濁水中水便澄潔令諸有目鑒衆色像如是以信置心品中能令俱生心品澄淨由此能見四聖諦理漸次增長成三菩提故信最應立為覺分勤於衆行徧能策發令其速趣卷四三乘菩提若無正勤雖已發趣中間懈廢終無所成是故立勤以為覺分有餘師說無始時來所以不能見四聖諦都由懈怠不樂聽聞如理思惟四聖諦理勤能治彼令樂聽聞如理思惟四聖諦理故能見四諦速證菩提故勤亦應立為覺分輕安息務令心調適行捨正直令心平等故能增長諸出世行令其速趣三乘菩提故立安捨以為覺分有餘師說無始時來惛掉亂心不見諦理由此不證三乘菩提輕安捨惛行捨止掉

由斯見諦速趣菩提故此亦應立為覺分若爾慙愧自性善攝於衆善品得白法名亦應立為菩提分法彼不應立以無慙愧惟與一切惡心相應於散戒中為勝障礙於見諦理為障力微與彼相違名為慙愧自性善攝得白法名雖於散戒有勝功力而於定善為助力微菩提分中取順定善助覺諦理故彼不立若爾應立無貪無瞋彼是善根自性善故亦不應立以諸貪瞋六識相應徧通五部是隨眠性廢麤惡業為勝加行斷滅善根障散善強違見諦劣卷四翻彼故立無貪無瞋得善根名自性善攝於散善業功力雖強助定善中勢用微劣菩提分法取順定善助覺諦理故彼不立若爾不放逸應立為覺分不放逸故衆行皆成佛每勸令修不放逸亦不應立於

散位中放逸令心馳散五欲能違施等散善用強非定位中此障用勝翻對彼故立不放逸但於五欲能防護心令不馳散專修施等故於散善力用雖強助定善中勢用微劣菩提分法取順定善助覺諦理故彼不立若爾不害應立覺分害能逼惱無量有情墮三惡趣彼能治故亦不應立害緣事生惱諸有情障修散善不害翻此助定力微故亦不應立爲覺分有餘師說大善法中若所治強自性勝者立爲覺分餘則不然所治強者謂與一切染心相應自性勝者謂助見諦如先所說信勤安捨具足二義慙愧等六無具二者謂慙等五二義並無不放逸一種惟闕自性勝何緣欣厭非覺分耶理實亦是念住等攝彼實總攝加行善故然不別立爲覺分者由此

二種行相相違俱不徧緣四聖諦境無一地
位容恆現前心品狹少是故不立有餘師說
夫欣厭者由慧觀境勢力引生覺分謂能順
生覺慧義相違故不應別立何緣尋伺二種
皆容有加行善及有無漏而於覺分一是一
非實亦俱通義如前說然別立尋不立伺者
尋於聖道策正見強由彼起時行相猛利尋
求諦理有助見能立爲道支伺則不爾以行
相起極微劣故有餘師說二俱行時尋行相
麤映蔽於伺惟伺起位行相轉微故覺分中
不別立伺策發正見自有正勤何更立尋以
爲覺分勤策正見有異於尋故道支中應並
建立謂勤策彼令速進修尋力策令速觀聖
諦何緣表業不立覺分覺分惟是順定善法
心俱無表有勝順能表業不然是故不立何

緣不立不相應行以爲覺分彼於助覺無別勝能不相應故非如無表雖不相應而於道輪有爲轂用故於覺分不別建立有餘師說二無心定能滅心故與覺相違四相及得於所相成有遷成用此於染淨起用平等菩提分法順淨用增故不別立何緣不立信爲覺及道支初發趣時信用增上已入聖位立覺道支信於爾時勢用微劣故不立在覺道支中何緣於覺支立喜輕安捨非亦立彼在道支中彼偏順覺不順道故云何順覺且修道中地地各修九品勝覺如如於諦數數覺悟如是如是發生勝喜由生勝喜復樂觀諦如人掘地獲寶生喜由生喜故復樂更掘故喜於覺隨順力增要由輕安息諸事務及由捨力令心平等方能於境審諦覺察故立安捨

在覺支中云何此三不順於道速疾運轉是聖道義此於速運少有相違並能令心安隱住故何緣於道立尋戒支於覺支中非亦立彼彼偏順道不順覺故云何順道且見道中尋策正見令於上下八諦境中速疾觀察戒能爲轂成見道輪令於諦中速疾迴轉故尋及戒俱立道支此復云何不順於覺且尋於諦不寂靜轉於聖諦理尋求相故覺已見諦安靜而轉故尋於覺少有相違覺是相應有所緣境有依有行戒此相違故於覺支不建立彼通運名道不可爲例何緣覺分不攝聖種分別論者許覺分攝故彼宗建立四十一覺分我許攝在念住等中而不立爲別覺分者以諸覺分在家出家俱能受行及有欣樂聖種惟有諸出家人受行欣樂在家有樂必

無受行故不別立有餘師說若許聖種總是無貪如前已釋若許第四體即是勤在覺分中無勞徵詰何緣證淨非覺分攝實亦攝在念住等中而不立為別覺分者以諸覺分進修義增數習方能證菩提故四種證淨證得義增見聖諦時漸頓得故由此證淨非覺分攝有餘師說此即信戒隨應亦在覺分中攝修覺分時必獲證淨此有幾種依何位得實體是何法有漏無漏耶頌曰
證淨有四種 謂佛法僧戒 見三得法戒
見道兼佛僧 法謂三諦全 菩薩獨覺道
信戒二為體 四皆惟無漏
論曰經說證淨總有四種一於佛證淨二於法證淨三於僧證淨四聖戒證淨且見道位見三諦時一一惟得法戒證淨見道諦位兼

四

十二

得佛僧謂見苦時得聖愛戒及法證淨於何等法如何而得法證淨耶謂惟於苦達惟有法無實有情生決定信如是次第見集諦時亦惟如前得二證淨達惟集法能為苦因無內士夫生決定信從此無間見滅諦時亦惟如前得二證淨達惟滅法是真涅槃誠可遵求生決定信從此後見道諦時兼於佛僧得二證淨於佛相續諸無學法得佛證淨於僧相續學無學法得僧證淨兼言為顯見道諦時亦得聖戒及法證淨達惟道法是證滅因誠可遵求生決定信然所信法略有二種一別二總總通四諦別惟三諦全菩薩獨覺道菩薩道者惟有學法獨覺道者通學無學若無漏信緣別法生名不雜緣於法證淨若無漏信兼緣佛僧名為雜緣於法證淨故見

三諦惟得二種見道諦時具足得四見道諦位爲於現前得佛法僧三證淨不非皆現得見道諦時現行總緣諸道諦故應知現在惟有雜緣一法證淨乘此勢力修得未來多剎那信於中有別緣佛法僧或有總緣二三寶者諸別緣者名三證淨諸總緣者法證淨攝道類智時修八智故亦得三諦法戒二種道法忍等三剎那中未來惟修道諦四種由所信別故名有四應知實事惟有二種謂於佛等三種證淨以信爲體聖戒證淨以戒爲體故惟有二若七支戒實惟一者如何覺分中實事有一一應惟有十種或十六或多以覺分中身語二業說有差別及相有異正命一種雖有別說離身語業無別體相依有別相前覺分中說言實事有十一種雖身語業一

一有多然種類同故各立一如四念住前三證淨謂慧與信若不離緣隨所緣別雖有多種而類同故各立爲一此亦應然今證淨中依身語業聖戒相等及契經中同說不缺不穿等故總立爲一隨身語業類別分二聖戒相同總立爲一故二與一無相違過爲依何義立證淨名如實覺知四聖諦理故名爲證淨信三寶及妙尸羅俱名爲淨由證得淨立證淨名正信是心清淨相攝可名爲淨尸羅不是清淨相攝寧立淨名此四皆是清淨相攝離不信垢破戒垢故又此四種惟無漏故離垢無漏故立淨名此四何緣次第如是餘三以佛爲根本故佛於正說有功能故於彼證淨立最初正說功能由悟法故於彼證淨立爲第二現觀法藏惟聖僧故於彼證淨

立為第三觀法藏能依聖戒故於戒證淨立
在最後有言佛是正說法師是故最初立佛
證淨佛何所說愛盡涅槃是故第二立法證
淨為誰說法為向果僧是故第三立僧證淨
僧依聖戒而得建立是故第四立戒證淨有
說此四猶如導師卷四道路商侶及所乘乘故說
此四次第如是經言學位成就八支無學位
中具成就十學位亦成正脫正智何緣於彼
不建立支正脫正智以何為體頌曰
學有餘縛故 無正脫智支 解脫為無為
謂勝解惑滅 有為無學支 即二解脫蘊
正智如覺說 謂盡無生智
論曰有學位中尚有餘縛未解脫故無解脫
支非離少縛可名脫者非無解脫體可立解
脫智故有學位不立二支謂立支名依勝助

用在有學位既有餘縛雖有解脫無勝助用
無勝解脫故彼勝智亦無故此二支非在有
學無學已脫一切縛故依內解脫生二智故
有勝助用理可立支有學不然故惟成八解
脫體有二謂有為無為有為解脫勝解為體
無為解脫解惑滅為體前復有二謂學無學依
七聖身說名為學依第八聖立無學名惟有
為中無學解脫可得建立為解脫支解惑無
為無支用故支攝解脫復有二種謂時不時
有差別故有說慧心有差別故應知此二即
解脫蘊如是已說卷四正解脫體正智體者謂離
正見如前覺說即盡無生前名菩提今名正
智所言無學心解脫者心於何位正解脫耶
為於未來現在過去頌曰
無學心生時 正從障解脫

論曰如本論說初無學心未來生時從障解脫且應思擇本論此文說未來言應成煩重說生時言義已顯故此責不然隨問答故謂先問者問無學心於何世中正得解脫是故今答言在未來恐彼謂通未來一切復為簡別言是生時或但應言生時解脫然或有謂生時是現在為遮彼故言未來生時現是已生非生時故或就相續立解脫名則一切未來皆名正解脫若就行世立解脫名則惟生時名正解脫為別顯二義說未來生時諸煩重言必顯別義理應推究無容非撥依如是義故有頌曰

文於義已足 而復說餘言 非無義有文 應思求別義

雖於此位諸所有蘊皆得解脫而但說心然

不可言有缺減失以心所等隨從心故染淨法中心為主故雖無有我而可於心假說縛者脫者等故若已說勝義已說餘或於此中如舉喻法舉心一法令類思餘雖諸學心亦於生位從障解脫而論但說初無學心生時解脫者據無餘斷證解脫故又此惟說純解脫故此中有心是自性解脫非相續解脫應作四句有學無漏無學世俗無學無漏餘世俗心如次應知四句差別此中雖舉正生剎那而實未來皆得解脫與正生者生障同故依此勢力所修卷四未來世俗善根亦得解脫依淨相續彼得生故為重顯示初無學心未來生時從障解脫是故本論復作是言謂無間道現趣已滅及解脫道現趣已生爾時無學心名從障解脫無間道者謂金剛定并定眷

屬臨過去位立以現名次後施設過去名故
趣已滅者顯在正滅隣次必入已滅位故解
脫道者謂初盡智并智眷屬臨現在位立以
現名次後施設現在名故趣已生者顯在正
生鄰次必入已生位故言爾時者謂正滅生
時無學心者初盡智俱起從障解脫者非惟
煩惱障色無色界感生果業亦是爾時所脫
障故此業亦障阿羅漢得由此古昔諸大論
師咸作是言業於得忍不還應果極為障礙
作如是釋本論所言則已釋經心解脫義道
於何位令生障斷頌曰
道惟正滅位 能令彼障斷
論曰惟言為顯正滅非餘如生未生道俱解
脫非滅已滅俱令障斷寧知正滅位能斷障
非餘以說道正生正從障脫故道未生位未

卷四

十七

得解脫道已生位已得解脫俱不可立正解
脫名若道正滅時不能斷障如何道生位得
正脫名故正滅時道能斷障於前後位斷用
定無如何未生亦名解脫與正生者生障同
故如世現見開水路時近水遠水皆言離障
如是既見能斷惑道身中已生亦應可說近
心遠心皆得解脫或如正起初無學心有得
正生名正解脫如是彼類未來所修無漏心
等有得起故定不生法尚得名為正得解脫
況當生者此中所說正解脫言顯已解脫心
今正得解脫如是所說豈不相違已解脫言
據自性解脫今解脫言據從障解脫所望各
異何義相違或已解脫言據本有解脫據在
身行世說今解脫言由此所言無相違失諸
行世者皆解脫耶不爾要勤破生障者有餘

師說正解脫時亦得名爲心已解脫性是已捨煩惱障故理必應然以解脫道依無煩惱相續轉故已出障故名已解脫今行世故名今解脫由此所說互不相違經說心從貪今得解脫此所言解脫其義云何爲是令心與貪相離爲令貪性不復緣心心名有貪爲相應故爲所緣故爲得隨故若相應故應惟染心名得解脫便違自宗說離貪心得解脫故又若此法與彼相應必定無容令此離彼心應畢竟不解脫貪若所緣故應染汙心亦得解脫理不應說貪相應心名爲解脫又彼貪性若緣此心無暫不緣及餘緣義如何可說心脫彼貪若得隨故應有學心亦名有貪依止貪得所隨相續而現起故正理論者作如是言惟離貪心今得解脫何等名曰有貪離

釋四

十八

貪二種心相謂心若與貪相應者名有貪心若不相應亦不爲貪同類因者名離貪心乃至有癡離癡亦爾既說離貪心得解脫即立解脫惟不染心然不染心總有四種謂有漏中分善無記及無漏中分學無學言離貪心今解脫者今解脫有二謂行世相續諸有漏心一切皆有相續解脫加行得者亦許兼有行世解脫諸無漏心一切皆有行世解脫無學攝者亦許兼有相續解脫如契經中說有三界謂斷離滅於前所說二解脫中此何爲體如是三界差別云何頌曰
無爲說三界 離界惟離貪 斷界斷餘結
滅界滅彼事
論曰斷等三界即分前說無爲解脫以爲自體然三界體約假有異若就實事則無差別

云何名為約假有異謂離貪結名為離界斷
餘八結名為斷界滅餘一切貪等諸結所繫
事體名為滅界何緣三界如是差別謂有漏
法總略有三一者能繫而非能染二者能繫
亦是能染三者非二順繫染法斷此三法所
證無為如次名為斷等三界有餘師說惟斷
能繫別有無為斷餘不爾彼說能繫有緣八
結有緣愛結有緣餘事斷此三種所證無為
如次名為斷等三界有餘師說惟斷能染別
有無為斷餘不爾彼師說愛有緣八結有緣
愛結有緣餘事斷此三種所證無為如次名
為斷等三界隨所繫事別得擇滅故三說中
初說為善准此已釋諸契經中斷離滅想三
相差別或初業地我當斷想名為斷想若離
染地我正斷想名為離想若已辦地我已斷

想名為滅想或於已受蘊重擔中見不捨過
起欲捨想名為斷想以捨與斷名差別故若
於餘蘊不復生中見勝功德起欲求想名為
滅想不生與滅名差別故既得離染清淨相
續於諸蘊法無所顧戀於般涅槃見靜妙想
名為離想無戀與離名差別故若事能厭必
能離耶不爾云何頌曰
厭緣苦集慧 離緣四能斷 相對互廣狹
故應成四句
論曰惟緣苦集所起忍智就名為厭餘則不
然四諦境中所起忍智能斷惑者皆得離名
廣狹有殊故成四句有厭非離謂緣苦集不
令惑斷所有忍智緣厭境故非離染故應知
此中先離欲染後見諦者苦集法忍及見道
中苦智集智但名為厭緣厭境故忍不名離

惑先斷故智不名離非斷治故并修道中加
 行解脫勝進道攝苦智集智但名為厭緣厭
 境故不名為離非斷治故有離非厭謂緣滅
 道能令惑斷所有忍智能離染故緣欣境故
 應知此中未離欲染入見諦者滅道法忍及
 諸所有滅道類忍并修道中無間道攝滅智
 道智但名為離是斷治故不名為厭緣欣境
 故有厭亦離謂緣苦集能令惑斷所有忍智
 應知此中未離欲染入見諦者苦集法忍及
 諸所有苦集類忍并修道中無間道攝苦智
 集智有非厭離謂緣滅道不令惑斷所有忍
 智應知此中先離欲染後見諦者滅道法忍
 及見道中滅智道智并修道中加行解脫勝
 進道攝滅智道智

阿毗達磨藏顯宗論卷第三十四 說一切有部

音釋

策 策草切束也
 匱 匱求位切
 數 數色角切也
 慵 慵力董切
 愞 愞快謂多惡不調也
 微 微去吉切
 詰 詰去吉切
 鄙 鄙劣龍切
 劣 劣龍切
 驗 驗也
 戀 戀力翁切
 慕 慕力翁切